

In fotograf che meritass dapli stima

Steiner ha fatg bleras fotografias artisticas en l'Engiadina

■ **(anr/vi) Da preschent mussa la Fundaziun da fotografia a Winterthur la lavur dad Albert Steiner (1877 – 1965). Il fotograf ha vivì 46 onns en l'Engiadina.** Sias fotografias da la cuntrada engiadinaisa sajan singularas, era cumpareglia sin champ internaziunal, scriva la Fundaziun da fotografia. Ils maletgs da Steiner hajan gidà ad impregnar il maletg da la Svizra sco cuntrada alpina d'ina bellezza magnifica.

Steiner è stà inspirà d'artists sco Giovanni Segantini e Ferdinand Hodler. Sias fotografias tradeschan in profund respect da la natira. Ins senta che l'artist era trasa a la tschertga d'ina bellezza universa-

la. «Sias cumposiziuns plain glisch e construidas a moda precisa espriman a moda impressiunanta la pitschnadad umana en vista a la maiestusadad da la cuntrada. Surprendentamain n'ha l'ovra da Steiner fin uss betg chattà la stima ch'ella meritass.»

Steiner sa sentiva sco artist

L'exposiziun porta il titel «Albert Steiner – das fotografische Werk». Mussas vegnan 150 lavurs che derivan da collecziuns privatas e publicas. Tranter il 1910 ed il 1930 ha il fotograf stgaffi sias pli impurtantas lavurs. L'exposi-

ziun mussa las differentas metodas d'interpretar il mund muntagnard da Steiner. L'emprim è quai stà in stil pittoresc e pli tard in stil pli sitg e grafic. «L'occupaziun intensiva, gea bunamain obsessiva, da Steiner cun il mund muntagnard deriva d'ina visiun independenta. Sco strusch in auter fotograf svizzer avant el, sa sentiva Albert Steiner sco artist. E cuntrari a blers da ses contemporans sa chapivi da sez per el che la fotografia è buna da crear art.»

L'exposiziun va fin ils 31 da matg. Il museum è avert il mardi fin la dumengia mintgamai da las 11.00 fin las 18.00.



Sur las vals e d'avent dals umans.



Saira al Lai da Segl, senza data.

FOTOS A. STEINER



Miracul d'enviern, senza data.



Saira sur ils Lais da Silvaplauna e Segl, senza data.

MAD